

2016 Nupela inteik - GPA Kwalfai lista i stap insait... Pes 7 igo pes 21

Paia kukim haus long Gerehu - P3



BEK 2 SKUL PROMOSEN!

BAIM 2 PELAZ SKUL BEK NA KISIM HAF PRAIS LON NAMBA 2 BEK

PLANTI MOA ISTAP

PROMOSEN BAI ISTAP INAP NAMBA 29 DEI BILONG MUN FEBUERI 2016

Only at... **THEODIST LTD** THE STATIONERY SUPERMARKET

Waigani Drive, POM Ph:313 9800 sales@theodist.com.pg

Markham Road, LAE Ph:472 5488 saleslae@theodist.com.pg

Mani sot- Gavman katim skolasip

K28m inap long 4,700 sumatin tasol

Esther Bralyn Wani i raitim

SAMTING olsem 4, 700 nupela sumatin bai i gat spes long ol tesian institusen long kantri namel long 23 000 sumatin husat i bin sindaun long gret 12 eksam long Novemba las yia.

Long las yia, samting olsem 5 628 sumatin i bin gat sans long go insait long ol tesian institusen tasol dispela namba i go daun long 4, 700 long disela yia.

Ekting Seketeri bilong Opis bilong Haia Edukesen, Profesa David Kavanamur i tok dispela i kamap bikos baset bilong skolasip i no inap.

'Mani i kam long Gavman i no inap long inapim olgeta sumatin long gret 12. Gavman i bin givim K45 milien las yia we i bin inapim planti sumatin tasol long 2016 Baset gavman i givim K28 milien tasol na i no inap long kisim planti sumatin,' Profesa Kavanamur i tok.

Profesa Kavanamur i tok dispela K28 milien em i inap long

sponsa long 4, 700 sumatin tasol we 7 400 kontinuing sumatin bai i nogat sponsa.

Tasol, Profesa Kavanamur i tok em i nidim K40 milien moa long sponsa long ol kontinuing sumatin we em bai go bek long kebinet.

Em i tok moa olsem kebinet i bekim toktok long givim narapela K40 milien bai sponsa long ol kontinuing sumatin. Em i wok yet long stretim dispela long luksave olsem ol sumatin i stap pinis insait long ol tesian institusen bai i gat sponsa.

Long wankain taim, Profesa Kavanamur i tok planti sumatin i no kisim ofa long ol kolis o yunivesiti bikos long wei ol i bin makim.

'Long PNG, i gat wanpela sans tasol. Tupela sans ol i save givim long ol Skul Liva Fom (SLF) pepa long gret 12 i no save wok aut bikos yumi gat planti gret 12 sumatin, na tu ol kolis na yunivesiti i save lukluk long namba wan sois bilong ol sumatin,' Profesa Kavanamur i tok.



PAIA BAGARAPIM FAMILI: Joseph Saa, wantaim famili bilong em i lusim olgeta samting long paia taim haus bilong ol i bin paia long Sarere las wik. Lukim stori bilong ol long pes 3. *Poto Nicky Bernard.*

CHECK-IN FAST! CHECK-IN ONLINE!

Avoid the airport queue! Online Check-in is available from **24 hours** to **3 hours** before departure.
*Online Check-in is not available for flights departing Australia and Japan.



Book Flights My Flight Book Hotels

Online Check In

Last Name

Booking Reference

Check In

Lida mas lusim Palamen sapos em i brukim lo

OL Memba bilong Palamen (MP) na ol lida husat i brukim lo bilong dispela kantri na husat i gat nem no gut, i no ken holim sia bilong ol pipel long Palamen Haus na i no ken bagarapim nem bilong ol pipel ol i makim tasol ol i mas risain na lusim sia we ol i holim.

Oposisen Lida Don Polye i tok dispela em i gutpela we long soim stretpela pasin bilong lidasip tasol planti ol MP o lida long PNG i no save lusim sia bilong ol pipel ol i makim long Palamen Haus taim ol i brukim lo na nem bilong

ol i bagarap.

“Long sampela demokretik kantri, ol lida husat i asua o husat i brukim wanpela lo bilong kantri, i save yusim het na lusim sia. I no gat wanpela man o meri bai tokim em long risain na lusim pablik opis, em yet i save risain,” Mista Polye i tok.

Tasol long PNG, maski ol lida i brukim lo na ol i asua pinias tasol, ol i save stap yet long Palamen Haus na mekim wok olsem lida bilong pipel na kantri.

“Long ol narapela demokretik kantri, dispela kain pasin i no save kamap

long Palamen Haus. Tasol yumi long PNG, Palamen Haus i kisim nem no gut pinis bikos sampela ol MP husat i brukim ol na husat i asua pinis long sampela pasin no gut ol i bin mekim, i stap yet long Palamen na kamap lida,” Mista Polye i tok.

Mista Polye i mekim dispela toktok long sapatim Hela Gavana Anderson Agiru, husat i bin singautim Palamen Spika, Theo Zurenuoc, long askim Suprim Kot long painimaut sapos Palamen i ken rausim ol MP husat i brukim lo na husat i asua

long mekim sampela pasin no gut.

Mista Agiru i bin tok ol memba husat i gat nem no gut na husat i save brukim lo bilong dispela kantri i mas lusim sia bilong Palamen Haus na risain o lusim wok olsem MP.

Mista Polye i wanbel wantaim Gavana Agiru long dispela toktok na em i laikim Praim Minista Peter O’Neill long soim gutpela pasin bilong stretpela lidasip na lusim sia bilong Praim Minista bikos em i gat planti asua i stap long kot.

Nupela hai komisina bungim O’Neill

NUPELA Hai Komisina bilong Australia i kam long PNG em i Bruce Davies.

Mista Davis i bungim Praim Minista Peter O’Neill las wik Fonde long Pot Mosbi.

Mista O’Neill i makim maus bilong gavman na tok welkam long Mista Davis.

Bihain long miting bilong tupela, Mista O’Neill i tok em i lukluk i go het long wok wantaim dispela nupela hai komisina bilong Australia, na strongim pasin poroman bilong tupela kantri.

“Hai Komisina Davis i no nupela man long PNG na ol ekspirens bilong em bai helpim em long mekim nupela wok bilong em.

“Mi amamas long harim olsem Hai Komisina Davis i save raun raun long PNG planti taim na bungim planti ol manmeri bilong yumi,” Mista O’Neill i tok.

Mista O’Neill i tok Australia em i gutpela poroman bilong PNG, maski sampela taim tupela kantri i no save wanbel long sampela samting.

“Wanpela nambawan



Mista Davis i bungim Praim Minista Peter O’Neill

samting i stap namel long poroman bilong tupela kantri em dispela pasin bilong toktok ples klia na tok tok long gutpela we.

“Mi bilip olsem Hai Komisina Davis bai stap namel long ol senia opisal bilong PNG Gavman na wok wantaim mipela long gutpela bilong tupela kantri wantaim.

“I gat planti wok mipela

bai mekim long strongim poroman bilong tupela kantri long sait bilong ikonometri na kalsa.

“Ol invesmen bilong Australia long PNG i wok long gro na tred namel long tupela kantri i wok long gro tu.

“Planti sumatin bilong PNG i wok long skul long Australia na mi laik lukim planti ol sumatin bilong

Australia tu long kam skul long ol yunivesiti na kolis long PNG.

Mista O’Neill i tok PNG na Australia bai sanap wantaim long toktok long ol bikpela samting i wok long kamapim birua long laip bilong ol manmeri long Pasifik rijon.

“Klaimet senis em i wanpela samting we em i kamapim bikpela birua long laip bilong planti manmeri long tupela kantri bilong yumi, na long ol arapela Pasifik kantri,” Mista O’Neill i tok.

“Bai yumi toktok moa long dispela na wokbung wantaim long ol arapela bikpela bung na long Pasifik Ailan Forum.

“Long COP-21 bung long Paris, Frans, Australia i bin toktok long sampela ol gutpela rot long daunim hevi bilong klaimet senis na mi save olsem ol opisa bilong PNG i wok long wokbung long kamapim ol dispela samting bilong daunim birua bilong klaimet senis,” Mista O’Neill i tok.

Strongim sevis long ol rurel eria...stopim bia long setelmen

Esther Bralyn Wani i raitim

KATOLIK sios i toktok strong long hevi i kamap long Nu Yia we ol spak man i go insait long wanpela haus long Morata insait long Nesenel Kapitel Distrik na bagarapim 4-pela meri.

Olsem 20 man i dring spak, brukim wanpela haus na go insait long dispela haus bilong ol sampela ol pipel na reipim olsem 4-pela meri. Namel long 4-pela meri, tupela i yangpela we kris-mas bilong ol i stap namel long 10 na 16 yia.

Jenerel Seketeri bilong Konprens bilong ol Katolik Bisop bilong Papua Niugini na Solomon Ailans, Pater Victor Roche i askim Nesenel gavman na Nesenel Kapitel Distrik (NCD) long stopim bia long ol setelmen we ol planti hevi i save kamap bikos long bia long ol bikpela taim olsem.

“Larim lo yet i mekim wok bilong en na mekim save long ol dispela man i kamapim hevi, larim ol komyuniti lida i go pas long lukautim ol memba bilong ol na kamapim bel isi long ol komyuniti i kisim bagarap,” Pater Roche i tok.

Pater Roche i lukim olsem i no gat gutpela lidasip na ol pipel tu i no save rispekim ol komyuniti lida long ol komyuniti na insait long ol famili tu.

Em i askim gavman na Nesenel Kapitel Distrik (NCD) long mekim sampela gutpela sevis long ol narapela taun na ol rurel hap we ol pipel i ken stap long ples bilong ol na i no painim ol bilas bilong siti na kam long siti.

Pater Roche i askim gavana Powes Parkop long rausim ol pipel long ol setelmen bai go bek gen long ol provins bilong ol, na no ken pulmapim siti nating we ol kain kriminel pasin i wok long kamap.

Long wankain taim, Dairekta bilong PNG Caritas, Raymond Ton, i tok ol komyuniti i mas gat gutpela kontrol long ol setelmen na plenim gut ol setelmen tu.

Sista Mary McCarthy husat i stap insait long dispela bung i askim ol dokta, kaunsila o husat i ken helpim ol 4-pela meri long sait bilong kaunseling.

“Dispela tupela yangpela meri bai i karim dispela hevi long laip bilong tupela na tupela i nidim tru kaunseling long helpim tupela,” Sista McCarthy i tok.



(Lephan-Raithan) Dairekta bilong PNG Caritas, Raymond Ton, Pater Victor Roche na Sista Mary McCarthy husat i bin toktok long Katolik Bisop Konprens.



EVERY HERO NEEDS A MAMA FLAME

Flame
STRENGTH & ENERGY

goodman fielder

Flame Plain Flour
Flame Self Raising Flour
Flame Wholemeal Plain Flour

Paia kukim haus long Gerehu

Nicky Bernard i raitim

WANPELA famili long Gerehu insait long Pot Mosbi i bin lusim haus na olgeta samting bilong ol taim paia i kukim long 7 kilok nait long las wik Sarere. Nogat man i kisim bagarap o dai long en.

Dispela haus em wanpela long ol olupela haus bilong bipo taim ol i kirapim Gerehu long kamap olsem wanpela sabeb.

Joseph Saa, bilong Enga i baim dispela haus long 1990 long wanpela man husat i bin stap long en bipo na em na famili bilong em i stap long en inap 24 krismas olgeta.

Saa i bin baim dispela olupela haus na stretim na em mekim insait bilong haus i nupela na gutpela. Em i tok sapos yu lukim ausait em olupela tasol insait bilong haus em i stretim gut tru.

Paia i kamap long 7 kilok nait taim Joseph wantaim meri bilong



Haus i paia long Gerehu Stage 3 insait long Pot Moresby. Foto: Nicky Bernard

em stap long liklik kentin bilong ol long sait bilong haus bilong ol, tasol tupela liklik pikinini bilong ol i bin stap insait long haus.

Joseph i tok paia asua long pawa

i mas kirapim paia na em i hariap tru kukim ol timba na go bikipela hariap.

Joseph i tok taim paia go bikipela na em i ron i go insait long sekim

tupela pikinini bilong em, tasol tupela bin go aut pinis long baksait dua tasol olgeta samting bilong ol i paia pinis. Ol i sevim tasol wanpela kar bilong ol i stap aninit long haus taim paia i lait yet antap long haus.

Joseph i tok paia stesen long Gerehu i stap klostu long haus bilong em na taim paia i liklik yet, ol bin ringim ol paia man tasol telepon bilong ol i ring nating. Na bihain long 45 minit taim paia i bikipela na karamapim haus, ol i harim sairen bilong paia kar i kam.

Em tok tu olsem paia kar tu i

nogat planti wara bilong kilim dai paia na taim ol wasim liklik hap tasol, wara i pinis. Na dispela i mekim ol paia man tu painim hat long kilim paia long wanem i nogat wara i ran long sait bilong Gerehu long dispela taim.

Joseph i tok haus bilong em, em noagt insurens na dispela bai givim bikipela hat wok long sanapim nupela haus long wankain hap yet.

Em i tok liklik kentin bilong em bai traim long helpim em long painim ol nupela samting bilong sanapim nupela haus, tasol em wari long haus bilong em long wanem em mekim bikipela senis long 1990 i kam inap long stat bilong 2016 we em longpela taim stret em na famili bilong em i stap long en.

Joseph i singaut go long ol wan haus lain bilong em sapos ol laik helpim em ken ringim em long mobail fon bilong em long 70643942.

MV Kimbe Kwin i bungim hevi

Michael Novingu i raitim

PASINDIA na kago sip, MV Kimbe Kwin i pas long rif long solwara long Lasul Be long boda mak bilong Is na Wes Nu Briten long las wik.

Kampani Rabaul Shipping i papa long dispela pasindia na kago sip, MV Kimbe Kwin, taim em i wokim ran bilong em i go long Kimbe wantaim 49 pasindia na sampela kago, taim em i painim dispela hevi.

Bosman bilong polis long Is Nu Briten, Peter Kusup, i tok Kimbe Kwin i bin usim Rabaul bris long go long Kimbe long Desemba 22, 2015, na long Desemba 23 long bik moning, sip ya i painim hevi namel long solwara bilong Lasul Be.

Em i tok antap long sip, i

gat 49pasindia na 15-pela em ol liklik pikinini krismas bilong ol i stap aninit long 15 yia, 19-pela em ol meri na 15-pela em ol bikipela man.

Kusup i tok, ol i kisim ripot olsem ol woklain antap long sip i kisim strongpela dring na ol i pak.

Em i tok wanpela wokman long sip i laik senisim Kepten long stiaim sip na kamapim dispela hevi long putim sip antap long rif.

Em i tok ol i salim signal long kisim helpim na wanpela sip bilong Lae i save painim pis, em Red Tulip 888 kampani Frabelle i papa long em, i kisim signal na kam bihain long 10-pela aua na helpim ol pasindia i kisim taim nogut long Kimbe Kwin.

Kusup i tok ol woklain bi-

long em i karimaut wok painim i go insait long dispela hevi.

Long wankain taim, bosman bilong Disata opis long Is Nu Briten, Donald Tokunai i tok ol pasindia i kisim liklik bagarap long bodi bilong ol bihain long ol i stap 12-pela aua long wet long kisim helpim.

Em i tok tu olsem ol pasindia i kisim hevi em ol i bin kisim ol i go long Nonga Haus sik long Rabaul na kisim tritmen long bodi bilong ol, na larim ol i go long haus bilong ol.

Tokunai i tok ripot ol i kisim long ol woklain bilong MV Kimbe Kwin i tokaut olsem aninit long sip, em i bruk na bagarap pinis.

Em i tok ol polis bai kari-maut wokpainim long dispela hevi.



Statim wok long nupela haiwe rot long Namatanai

Ahimsa Kibikibi i raitim

PLANTI pipel insait long Namatanai Distrik long Nu Ailan provins i bung wantaim Gavana na memba bilong ol, Sir Julius Chan, long mekim wok long nupela haiwe rot bilong ol.

Ol i statim ol rot wok wantaim wok bilong putim kolta long nupela haiwe rot.

Dispela nupela haiwe em ol i kolim long Lanzarote Haiwe, bihainim nem bilong wanpela man husat i mekim bikipela wok tru long planim kokonas plantesen, na wok long graun long hap planti long provins i save kolim long las kona.

Nem bilong dispela man em Dick Lanzarote na em i bin wok tu long gavman pastaim.

Gavana i putim selmani o mimis long nek bilong Ethel, wanpela bubu bilong Dick Lanzarote, taim ol i mekim wok kastom long putim nem long nupela haiwe. Foto: Ahimsa Kibikibi

Mista Lanzarote i bin helpim gut tru Gavana nau, Sir Julius Chan, long namba wan kempen bilong em long 1967.

Dispela haiwe rot bai ran stat long ples Salimun na i go inap long Metlik.

Bikipela kampani bilong Saina, MCC i winim kontrak long putim kolta long nupela haiwe.

Need a New laptop, Uniforms or Text books?

BSP PERSONAL LOAN



www.bsp.com.pg f t in

Skul i mas klin bipo skul i stat- Dokta Uke

EKTING Seketeri bilong Edukesen, Dokta Uke Kombra, i singaut long olgeta skul long kantri long yusim narapela tupela wik long klinim skul bilong ol bihain long 2016 skul yia i stat long Januəri 25 bilong ol tisa, na Januəri 1 bilong ol sumatin.

Pastaim, namba wan wik i no bin save kamap gut bikos edministresen na

menesmen bilong skul i bin save yusim dispela taim long klinim skul graun bilong ol.

Long dispela, ol pipel i save lukautim skul, ol prinsipel, het tisa, ol bot memba, gavaning kaunsil, ol tisa na ol papamama i mas ogenaism ol yet na yusim dispela tupela wik i stap yet long klinim skul na bildim klasrum, ol laibreri,

ol kompiuta leb na ol opis.

Em i bikpela samting olsem ol sumatin i mas go bek long wanpela skul, klasrum na skul graun i klin na redi long lain nupela samting na pinisim gut wanpela de long Mande Februəri 1.

Edukesen bilong ol pikinini bilong mipela em i bikpela samting na ol skul long kantri i mas tingting strong long dispela samting na stat long klinim skul graun bilong ol.

O'Neill: Ol mani bilong papagraun stap gut

OL manibilong ol papagraun bilong wan wan projek eria long PNG LNG Projek i stap gut tru na i no gat wanpela man i tatsim mani bilong ol papagraun, Praim Minista Peter O'Neill i tok.

"Ol intres na mani bilong ol papagraun long PNG LNG Projek i stap gut tru. No gat wanpela man bai yusim, stilim, salim o kisim i go long sampela hap. Olgeta mani bilong ol papagraun i stap gut tru," Mista O'Neill i tok.

Mista O'Neill i mekim dispela toktok long bekim toktok bilong Oposisen Lida Don Polye, husat i tok gav-

man i tingting long yusim dispela 4.27 pesen Kroton Ekwiti bilong ol papagraun long kisim sovren bond.

Mista Polye i tok gavman i wok long yusim Kumul Petroleum Holdings Limited (KPHL) long kisim na haitim ol mani kantri inap kisim longtaim long PNG LNG.

Mista Polye, husat i kolim Kumul Petroleum olsem 'pepa kampani' bilong gavman, i tok Kumul Petroleum i wok long haitim LNG mani na nau em i tingting long paulim ol papagraun na givim dispela 4.27 pesen i go bek gen long gavman.

Mista O'Neill i tok ol papa-

graun i mas painim mani long baim dispela 4.27 Kroton Ekwiti, we ol i bin wanbel long ambrela benefit sering agriment (UBSA) long yia 2009.

"Gavman bai bihainim tok promis long larim ol papagraun i baim dispela ekwiti sea na kisim benefit long PNG LNG Projek," Mista O'Neill i tok.

"Gavman i les long lukim ol kon man na giaman fainens kampani husat i wok long paulim ol papagraun. Mipela i les long dispela kain paul pasin i kamap," Mista O'Neill i tok.

Rejistresen bilong ITI i op yet



Ol sumatin i rejista long ITI long Badili insait long Pot Mosbi.

Esther Bralyn Wani i raitim

INTENESENEL Trening Institut (ITI) i kisim yet ol nupela sumatin bilong dispela yia na skul bai i stat long Januəri 25 long wanem planti sumatin i rejista yet. Samting olsem 1, 400 sumatin i rejista long Pot Mosbi na olsem 1,000 i rejista long Lae brens bilong ITI.

Maketing Menesa bilong

ITI, Sammirose Javillonar i tok, 'Mipela i givim aut olsem 1, 100 ofa long dispela yia na ol nem lista i kam aut pinis tasol mipela i gat moa spes long kisim olsem 1,500 sumatin.'

Em i tok ITI givim edukesen long ol yangpela pipel long kantri we ol i ken isi long baim skul fi na ol i givim kwaliti edukesen we Gavman i luksave long ol olsem haia edukesen institusen.

'Mipela i stap 16 krismas long PNG na mipela i gat 6-pela brens long kantri na 4-pela distens senta long Kiunga na Hagen. Taim ol i gat intres bai mipela i opim nupela brens long Hagen na Kiunga,' Mis Javillonar i tok.

Em i tok moa olsem bihain long ol sumatin i pinisim skul long ITI ol i gat Sumatin Sapot tim we ol i save luksave olsem ol sumatin i mekim trening na painim wok bihain taim.

ITI i givim K200, 000 skolasip long ol sumatin

Esther Bralyn Wani i raitim

INTENESENEL Trening Institut (ITI) i givim K200, 000 long ol gret 10 na 12 sumatin husat i no inap long baim skul fi.

Samting olsem 60 sumatin long ol Nesenel na Sekenderi skul long kantri i kisim skolasip long greduesen bilong ol taim Maketing tim bilong ITI i go lukim na givim skolasip long ol.

'Olsem sosol wok bilong mipela, givim skolasip em i wanpela rot long helpim ol komyuniti na kantri tu.

ITI i save helpim long kamapim gutpela bilong ol yangpela pipel long kantri.

Mipela i mekim rot bilong ol sumatin long winim driman bilong ol,' Maketing Menesa bilong ITI, Sammirose Javillonar i tok.



Joseph Peter long Badihagwa Sekenderi Skul i kisim skolasip bilong em, Prinsipel Mista Bala, Mista Sam Lora long Dipatmen bilong Edukesen na Maketing Menesa bilong ITI, Sammirose Javillonar.

Mis Javillonar i tok PNG i nid long developim moa human risos long ol haia edukesen institusen olsem ITI.

ITI i bin mekim dispela program long 2009 olsem komyuniti servis bilong ol. Ol i helpim ol sumatin i no gat mani long sapotim ol yet long skul fi tasol i gat bikpela save tasol i no inap long go het na skul bikos ol i sot long mani.

'Dispela skolasip bai go inap long 17 mun insait long tripela taim skul i save stat long wanpela yia. Husat sumatin i lusim sans bilong em long kisim dispela skolasip bai narapela sumatin i kisim,' Mis Javillonar i tok.

Ol Maketing tim bilong ITI i go long greduesen bilong ol skul insait long Nesenel Kapitel Distrik, Sentral, Isten Hailans, Manus, Ji-

waka, Westen Hailans, Morobe, Nu Ailan, Morobe Briten na Milen Bu provins long givim ol skolasip long ol 60 sumatin insait long kantri.

Long wankain taim, rejistresen bilong ITI i op yet inap Januəri. Samting olsem 1, 200 sumatin i rejista long Pot Mosbi na 1000 sumatin long Lae. Tasol, i gat moa spes i stap yet long husat i laik rejista.

On
it's 16th
year

WHY STUDY AT ITI??

International Training Institute is Accredited
by the Government as a
HIGHER EDUCATION PROVIDER!

ITI's Affiliations & Associations with:

- USQ - University of Southern Queensland
- ACBM - Australian College of Business Studies
- AGI - Acharya Group of Institutes in partnership with International Pathway Program (IEPP)
- IFTDO - International Federation of Training & Development Organisation
- AAT - Association of Accounting Technician
- CPA PNG - Certificate of Practising Accountants of Papua New Guinea
- PNG HRI - Papua New Guinea Human Resource Institute
- ITI is also a Leading Private Institution in Papua New Guinea
- There are 6 campuses for you to choose from.
- Certificate courses in: Sales, Business, Accounting, Human Resource Management & Computing.
- Diploma courses in: Accounting, Management, Marketing, Human Resource Management, Information Systems, Internet Technology, Networking & Infomation Technology.
- Advanced Diploma in Accounting

ITI Campus Addresses

Port Moresby Campus
Scratchley Rd, Badili
P.O Box 6322, Boroko, NCD
Tel: 320 2800 Fax: 320 0513
Mobile: 7685 0523/7297 5233
Email: enquires@iti.ac.pg

Lae Campus
Cnr Frigate & Butibum St, Voco Point
P.O Box 618, Lae, MP
Tel: 472 2790 Fax: 472 0199
Mobile: 7342 8032
Email: enquires.lae@iti.ac.pg

Kimbe Campus
P.O Box 694, Morekea Town
Kimbe, WNB
Tel: 983 4922 Fax: 983 5873
Mobile: 7990 9498/7239 2136
Email: enquires.kimbe@iti.ac.pg

Kokopau Campus
Autonomous Region of Bougainville
P.O Box 704, Buka Island
A.R.O.B
Mobile: 7162 5486/7913 2976
Email: enquires.kokopau@iti.ac.pg

Alotau Campus
Education Milne Bay, Wanigili
P.O Box 142, Alotau
Milne Bay Province
Tel: 6411 223
Mobile: 7756 8213 / 7079 0821
Email: enquires.alotau@iti.ac.pg

Goroka Campus
Okuk Highway, Opp. Mt. Sion
P.O Box 543, Goroka
Eastern Highlands Province
Mobile: 7619 7939 / 7263 6996
Email: enquires.goroka@iti.ac.pg

Drop-off, Transport provided for Night Class Students

We offer Day & Nigh Classes

Application is OPEN for January Intake in all 6 Campuses!

Orientation week: January 13 - 15

Apply now to secure your space!!!

"Investing in Quality & Affordable Education for your Future"



Ol Luteran i wokabaut i go long sinod na yu ken lukim sampela bilong ol hia long foto bilong Paulus Tali.

Wokabaut i go long Luteran sinod

NAMBA 30 bikpela Luteran Sios sinod o bung i kamap nau long wanpela wik long Heldsbach Misin stesen, Kote Distrik long Finsafen i pulim moa long 50 sios memba i wokabaut long rot i go olgeta long hap bilong sinod.

Na narapela 20 Benong Luteran yut long Bumayong long Lae i kalap long wilwil long Bumayong Luteran sekenderi skul long Januari 3 na bihanim rot i go long Finsafen Haiwe long go kamap long ples bung i kamap long en.

Ol Kuma Luteran memba bilong Jiwaka distrik insait long Jiwaka provins i laik givim taim na wokabaut bihanim lek misin bilong ol misineri na evanjelis long Kate, Yabim husat i bin givim taim bilong ol long karim Gutnius i go long hailans rijon.

Moa long 150,000 i save joinim Katolik Sios long Amerika

Pater John Flynn, LC long Zenit Nius Ejensi, Vatiken, i raitim

PLANTI pipel i save olsem planti manmeri i wok long lusim sios stret bilong ol, tasol hamas i save olsem olgeta yia, samting olsem 150,000 bikpela manmeri long Amerika i save go insait long Katolik Sios long Amerika?

Wanpela buk ol i kolim, "Becoming Catholic: Finding Rome in the American Religious Landscape," em David Yamane, (Oxford University Press), i raitim, i glasim ol wok i go gut long "Rite o seremoni bilong mekim ol bikpela manmeri i go insait long Kristen sios (RICIA)

Yamane i wanpela sosioloji tisa long Wake Forest Yuni-versiti, i raitim planti buk long Katolik Sios long Amerika.

Dispela nupela buk bilong em i kamap bihain long planti yia bilong wok risets, intaviu na filwok em na ol narapela lain risets manmeri i bin kamapim bihain long ol i raun i go long ol Katolik peris long Amerika.

Dispela i wanpela buk tasol i gat ol wok glasim long RICIA program na em i stat long taim RICIA program i bin stat

bihain long disisen bilong Vatiken 2.

Yamane i tok long stat yet bilong Kristianiti, "conversion" o lusim narapela lotu na go insait long Katolik Sios i hap bilong sios, maski em Saul i bungim Kraus long rot i go long Damascus, o go insait long Katolik Sios bilong Empera Constantine.

Sampela ol biknem manmeri long wol husat i lusim ol sios bilong ol na kamap ol Katolik em Kadinel Newman; Santu Elizabeth Ann Seton; G.K. Chesterton, J.R.R. Tolkien, Dorothy Day na Thomas Merton.

Stat yet long 1988, moa long tu milien bikpela manmeri i bin go insait long Katolik Sios long Amerika aninit ong RICIA Program.

Dispela na long ol yia pastaim, moa long 5.6 milien manmeri i lusim ol lotu bilong ol na joinim Katolik Sios na samting olsem 11 pe sen em long Amerika.

Dispela em namba 5 bikpela rilijes bodi long Amerika bihain long Mormon Sios, na winim Evanjelikel Luterna Sios.

Dispela 11 pe sen grup (I lusim lotu bilong ol na joiim Katolik Sios) i karamapim 8 pesen husat i bin memba bi-

long ol Protesten sios, 2 pe sen i no memba bilong wanpela sios, na 1 pe sen i kam long ol narapela sios.

Taim Yamane i no gat kliapela toktok long as bilong dispela, em i tok marit namel long ol lain bilong narapela narapela sios em i strongpela as.

Em i tok ol risets long ol yia long 1940 na 1950 i soim olsem 75 pe sen long ol lain i joinim Katolik Sios i kamap bikos long intafeit marit.

Narapela stadi long leit 1970s i panimaut olsem intafeit marit o marit namel long ol narapela narapela lotu i kamapim moa long 80 pe sen bikpela man na meri i joinim Katolik Sios.

Wanpela stadi i soim olsem samting olsem 60 pe sen pipel long Amerika i save marit long ol narapela sios.

Tasol Yamane i tok ol lain bilong ol arapela sios i maritim ol Katolik lain na go insait long sios i kamapim bikpela namba, i no olsem ol i wok long painim sios (religious shopper), no gat.

Em i tok tru, ol sosel netwok i mekim klia as we sampela pipel i save go insait long Katolik Sios, em i tok ol i no mekim klia mining o as tingting watpo ol i wokim disisen

long kamap ol Katolik.

Yamane i tok wokim disisen long kamap Katolik i no glasim tasol wanem rot long kisim. Tasol long stap insait long miks marit em i bikpela samting long ol senis i ken kamap insait long famili.

Em i tok senis i save kamap taim ol manmeri i laik kamap ol gutpela mama o papa, ol meri na ol man (husbands & wives).

Taim we man na meri i save wokim disisen long senis lotu na kamap Katolik i save kamap long taim bilong em yet na Yamane i tok dispela i ken kamap taim tupela marit i tokaut long prensip bilong ol, ol i marit, taim ol i kamapim pikinini o kisim namba wan komyunio.

Em i tok disisen long kamap Katolik em i olsem "moral action" o tupela i tingting long stretpela o ino stretpela pasin, gutpela o nogut bilong yumi ol manmeri.

Ol ripot long buk i autim olsem Yamane na ol risetsa bilong em i bin painim olsem we ol i go hetim RICIA program long peris level na sapos ol lain i go insait long program i klia long as tru bilong stap Katolik, moa bai kamap ol Katolik Sios memba.



GLASIM TOK
wantaim
Fr Lollington Wiam

Redi long senis na bungim salens

LONG Glasim Tok kolum, mi kamapim planti toktok bilong wok politik, Sios bilong God, laip bilong yumi, pasin bilong stil na planti moa. Tru, planti pipel bilong yumi insait long Hailans, Momase na Niugini Ailan i lain bilong tok pisin na taim mi kamap wantaim Tok Pisin long Glasim Tok kolum ol i isi long rit na save long wanem samting i wok long kamap long Kantri bilong yumi PNG.

Tru tumas, planti wok politik hia long Waigani i bagarapim yumi pinis na yumi ting Kantri bilong yumi i stap orait, tasol nogat. Long Tok Inglis bai mi tok, "Crazy Waigani" o "Crazy government." Long dispela kresi pasin, yumi lukim dinau mani i roket i go antap long mun stret na Kantri i gat K22 bilien long bekim dinau mani.

I luk solem em bai kisim 10 – 15pela kris-mas long bekim. Gavman i larim ol Esian i kam insait long PNG olgeta de na kilim dai binis bilong ol asples na ol i tekova. I gat bikpela asua i stap long Manus Asailam Senta, tasol gavman i no mekim wanpela samting yet.

Pasin bilong stilim graun i go bikpela tasol yumi i no mekim nois yet. Planti bilien kina wok kontrak projek gavman i save givim i go long ol ovasis kampani na kilim dai binis intres na kampani bilong ol asples.

Mosbi i wok long senis olgeta de planti samting long kantri i no go gut olsem, Fri Edukesen i nogat gutpela plen na ol skul na tis i kisim hatpela taim long wanem, welfea bilong ol i no stap stret, olgeta infrastraksa bilong ol skul i bagarap, sains leb na laibreri i nogut na planti moa. Eksens reit bilong foren karensi i roket i go antap na PNG i wok long lusim milien kina long olgeta de.

Ol ovasis lain i wok long stilim planti resos bilong yumi na sampela memba i pulmapim hait mani long poket na i no mekim wanpela samting yet. Tru, yumi papa graun tu yumi pasim maus, pasim iau na kamap ai pas olgeta.

Tasol maski yumi bungim hevi, wari na ol kain salens, yumi lus tingting na spenim taim wantaim Santu Bebi Jisas. Taim bilong redi pinis na nau em i taim bilong tok yes Jisas, kam insait long siti bilong yumi wanwan.

Sapos yumi wanbel, lus tingting long bia, famili pati na famili bung. Nau em taim bilong pati na bung wantaim Jisas insait long siti bilong yumi.

Taim bilong tok tenkyu na taim bilong amamas. Yumi i no ken wari long wanem gavman i wok long bulim yumi, tasol wari long wanem God i wok long mekim gutpela samting long yumi. Tingim, God i redi pinis long givim yumi wanpela pasel o presen. Yumi redi tu long bekim dispela presen,

Mi redi long givim na yu?

Amamas bilong nupela yia, 2016 i stap wantaim yupela.

IMF tok long PNG ikonomi stap gut

PRAIM Minista Peter O'Neill i amamas long Intenesenel Monetari Fan (IMF) i tokaut long tru tru samting i kamap long ikonomi bilong PNG.

Wanpela ripot IMF i kamapim i luksave long gavman i kirapim ikonomi bilong PNG.

IMF i tok ikonomi bilong PNG bai gro long yia 2016, tasol i givim tok lukaut olsem prais bilong komoditi o ol samting bilong samting bilong salim bai go daun yet.

IMF i sapotim tingting bilong PNG long go insait long sovren bond maket na kisim sovren bond. Em i tok gavman i mas yusim mani em i kisim long sovren bond long bekim dinau na kirapim ol projek long kamapim moa ikonomik developmen long kantri.

"Dispela tok tru i kam long IMF na mi amamas long dispela toktok na lukluk bilong IMF. Dispela toktok i wankain olsem ol plen gavman i gat long lukautim ikonomi na mani bilong PNG taim prais bilong oil na ol komoditi i wok long go daun," Mista O'Neill i tok.

Mista O'Neill i tok long dispela yia, gavman i tingting long go insait long sovren bond maket na givim aut sovren bond long kisim mani.

Em i tok dispela bai helpim gavman long kisim mani long bekim ol dinau na kirapim ol projek insait long klantri, we ol projek bai larim ol manmeri i wok na kisim mani long lukautim famili bilong ol.

"Tasol yumi gat sam-pela manmeri husat i

no save gut long sovren bond em i wanem samting stret. Ol dispela kain manmeri i wok long mekim planti toktok egensim dispela gutpela plen bilong gavman long i go insiat long sovren bond maket na kisim mani.

"Ol i wok long ting dispela sovren bond em wankain samting bilong painim mani long baim 4.27 pesen Kroton Ekwiti bilong ol papagraun long PNG LNG Projek," Mista O'Neill i tok.

Opposisen Lida Don Polye i tok Mista O'Neill i laik yusim dispela 4.27 pesen Kroton Ekwiti olsem sekyuriti long kisim narapela dinau mani long sovren bond maket.

Mista Polye i tok gavman i no ken yusim mani bilong ol LNG Projek eria papagraun long

kisim dinau moa dinau mani.

Mista Polye i tok ol pepa bilong 2016 Nesenel Baset i tok PNG i salim 336,000 trilien kiubik fit (tcf) ges bilong PNG LNG long yia 2015 long prais 12.4 US dola (K37) long wan wan tcf.

"Dispela i soim olsem gavman bai kisim klostu long K12 bilien o K13 bilien long yia 2016. Tasol ol papagraun i no kisim mani na mani bilong LNG i stap we?"

"Gavman i mas tokim mipela. LNG mani i stap wer? Gavman no ken kisim moa dinau long sovren bond maket," Mista Polye i tok.

Polye i tok gavman i no lukautim gut ikonomi bilong dispela kantri taim prais bilong oil na ges i wok long go daun long intenesenel maket.

Fri sevikel kensates long PIH

...Mak long namba wan 45 meri tasol

SAMTING olsem 46 meri bai stap laip na go hetim sindaun bilong olbaigo moa yet bikos long Redio FM Sentral na Pasifik Intenesenel Haus sik (PIH).

Dispela i kamap wantaim K10,000 donesen mani FM Sentral i givim i go long PIH long givim sans long 45 meri i kisim fri sevikel kensates long bilum bilong bebi.

Dispela fri tes em long 45 i go nau bikos

bihain long dispela namba, bai i no gat fri tes.

Long kisim dispela tes ol i kolim "pap smear", wan wan meri o mama i save baim K270, tasol donesen na wok bung namel long FM Sentral na PIH i mekim isi long 45 meri husat bai go kisim dispela fri tes, stat long dispela wik.

FM Sentral bai putim ol vausa long opis bilong ol na husat meri i laik kisim tes i ken go

long opis bilong ol na kisim fri vausa long go kisim fri sevikel kensates long PIH haus sik long Mosbi.

Ol ripot i tok olgeta yia, samting olsem 3,000 nupela keis bilong sik i save kamap long ol meri long PNG.

Ol meri i gat sevikel kensa i ken kamap orait sapos ol i pilim olsem ol i gat dispela sik na ol i hariap i go sekap long haus sik.

Agiru na Potape bai wetim Februeri 19

SUPRIM Kot long Waigani i no luksave long Anderson Agiru o Francis Potape olsem gavana bilong Hela Provins.

Ol pipel bilong Hela i bin makim Mista Agiru i kamap gavana long 2012 nesenel ileksen, na ol memba bilong Hela provinsal asembli i bin makim Mista Potape, husat i Memba bilong Komo-Margarima, i kamap nupela gavana bilong Hela long Desemba 29, 2015.

Suprim Kot jas Jastis Sir Bernard Sakora long Trinde (Januari 13) i tok tupela lida i mas wetim desisen bilong Nesenel Kot long Februeri 19, we kot bai tokaut long husat i gavana tru bilong Hela Provins.

Nesenel Kot nau i wok long sekim sapos Mista Potape i bin

bihainim lo stret long kirapim vot i no gat bilip long Mista Agiru na kisim sia bilong gavana bilong Hela Provins.

Jastis Sir Bernard i tokim ol loya bilong tupela lida olsem Suprim Kot i les long givim luksave long Mista Potape olsem gavana tasol kot i bihainim Nesenel Kot oda na larim Mista Agiru i mekim wok bilong em olsem gavana bilong Hela bikos em i bin stap gavana pastaim.

Long Januari 7, Nesenel Kot jas Jastis Derek Hartshorn, i bin tokim Mista Agiru long mekim wok bilong em olsem gavana bilong Hela taim ol i wet long larim kot i sekim sapos Mista Potape i bin bihainim stretpela rot aninit long Ogenik Lo bilong Provinsal na Lokal Level Gavman long larim Hela provinsal asembli

memba i makim em i kamap nupela gavana.

Mista Potape i bin apil long Suprim Kot long i luksave long em olsem nupela gavana bilong Hela bihain long ol memba bilong provinsal asembli i bin makim em i kamap gavana long Desemba 29, 2015 long Tari.

Tasol Jastis Sir Bernard i tok Nesenel Kot i wok long sekim sapos ol memba bilong Hela provinsal asembli i bin brukim lo long makim Mista Potape i kamap gavana.

"As tru bilong dispela samting em i stap yet long Nesenel Kot na dispela i mas pinis pastaim. Bi-hain long dispela, yupela i ken apil gen long Suprim Kot sapos yupela i no wanbel long Nesenel Kot desisen," Jastis Sir Bernard i tok.



Kainkain gaden kaikai na prut i pulap long Godens maket

Gordons Maket long Pot Mosbi em i wanpela bikpela holsel na ritel kaikai maket i save gat ol planti gutpela kaikai.

Ol fres kaikai i save kam long Hiritano na Magi Haiwe, Brown Riva, Sogeri na ol arapela ples ausait long Mosbi siti.

Maket ya i save helpim tru ol mama i salim ol kaikai samting long helpim famili bilong ol.

Ol bikpela hip kaikai kaukau na poteto, bikpela mekpas kumu, ol raupela kabis, ol fres kerot, ol kokonas, ol melon, painap, kukamba na planti ara-

pela prut, ol gaden kaikai na kumu em yu ken baim long liklik mani o prais i daunbilo long ol arapela maket long Mosbi siti.

Long dispela sisen o taim bilong prut, painap na melon i pulap kapsait long Gordons maket, tasol stat long dispela wik, Gordons maket i pas bikos ol bai rausim olgeta samting insait na bildim nupela na gutpela maket haus na ples. Wantok i no nap long kisim toktok i kam long NCD long wanem hap ol lain bai maket taim ol istretim na kamapim gut Gordons maket. **Poto: Nicky Bernard**

PNG i mas kamapim moa yunivesiti na ol tesimal institusen



KOMENTRI

OL skul i kisim tok save long dispela wik olsem ol tisa i mas stat wok long neks wik, 25 Januəri. Seketeri bilong Edukesen i putim tok save long niuspepa olsem ol tisa i mas go bek wok nau na stretim ol samting na redi long statim skul long Februeri 1. Em i tok long Februeri 1, ol tisa i mas skulim ol pikinini insait long klasrum na i no ken mekim ol arapela wok bilong stretim klasrum na baim ol saplai. Em i tok olgeta yia, ol tisa i save westim namba wan wik bilong skul long mekim dispela ol wok redi na i no mekim wok bilong skulim ol pikinini.

Gutpela toktok bilong seketeri na yumi hop ol tisa long kantri bai harim tok na redi gut long statim skul long Februeri 1. Tasol olsem wanem long mani bilong ol skul – dispela mani bilong tuisen fi fri edukesen?

Dispela mani i stap pinis long akaun bilong wan wan skul o nogat? Planti skul bai i no inap long redi gut sapos i no gat mani bilong baim ol materiel na ikuipmen ol tisa i nidim long skulim ol pikinini. Prinsipal i mas gat inap pepa na ink na ol arapela saplai bilong putim ol tok save i go aut long ol tisa na ol papamama tu. Sapos i no gat mani bai skul opis tu i no inap long mekim ol wok redi bipo long skul yia i stat.

Ol papamama tu i mas givim han long skul na go klinim ol klasrum na katim gras na stretim ples bipo long skul i stat. Long planti skul, ol papamama i gat gutpela skul bod na ol i wok bung gut



Jada 0151

wantaim ol. Ol i save bung na mekim ol wok bilong klinim ol klasrum na stretim skul eria. Tasol i gat ol skul we ol papamama i no wok gut wantaim prinsipal bilong skul na skul bod. Ol dispela skul i

no luksave olsem hevi bilong ol bai bagarapim edukesen bilong ol pikinini bilong ol.

Long dispela wik tu, Opis bilong Haia Edukesen i putim lista bilong ol studen husat bai i go long ol yu-

nivesiti na ol arapela tesimal institusen. Las yia moa long 23,000 gret 12 studen i bin wokim eksam. Long dispela namba, 4700 tasol i kisim spes long ol yunivesiti na arapela tesimal institusen. Ol narapela bai i hatwok long painim spes nabaut long ol praivet trening skul o stap nating long haus. Ol dispela studen na ol papamama bilong ol tu i wari bikos ol i lusim bikpela taim na mani long pikinini i pinisim skul gut na kisim wok.

Namba wan as bilong hevi em kantri i no gat inap yunivesiti na ol bikpela tesimal institusen long kisim moa studen. Namba bilong ol studen i bikpela tumas na spes i sot. Olgeta yia yumi save harim wankain stori – no gat spes na ol pikinini i no kisim ofa long skul ol i bin aplai long en.

Wanpela rot tasol bilong stretim dispela hevi em long wokim

moa yunivesiti na skulim moa manmeri long kamap ol kwaliti tisa long ol dispela institusen long bihain taim. Sapos wan wan provins i gat ol teknikel trening in-

stitusen, na wan wan rijon i gat ol kempas bilong ol bikpela yunivesiti, ating bai yumi inap long stretim dispela hevi.

PNG i winim 40 yia pinis na yumi wok long bihainim yet sistem bilong bipo – watpo bai yumi no inap painim ol arapela rot bilong givim gutpela edukesen long ol pikinini bilong yumi?

Ating dispela bikpela mani tru gavman i wok long lusim long fri edukesen nau i ken go bek long kamapim kwaliti edukesen bilong bihain taim.

Yumi yusim mani long kamapim moa skul pikinini tude, tasol yumi no bisi long kwaliti bilong ol dispela studen na moa yet, yumi no tingting long ol spes long yunivesiti na ol arapela bikpela skul.

Wan wan rijon i mas gat ol yunivesiti o open kempus na ol teknikel skul we ol pikinini bilong yumi ken kisim skul long en. I mas gat ol kwaliti tisa o menesa i lukautim ol dispela institusen. Sampela yunivesiti i traim long kirapim ol open kempus tasol ol i no kisim gutpela helpim bilong gavman olsem na i gat planti hevi i save kamap.

Nupela yia i kamap nau na i mas gat sampela nupela senis i kamap tu long ol plen bilong bihain taim. Kwaliti edukesen bai inap kamapim ol gutpela sitisen bilong PNG long bihain taim.

Na dispela driman i ken kamap tru, sapos ol lida bilong tude i skelim gut mani na wok bilong mekim dispela driman i karim kaikai.

Gavman i tok save long Nesanel Anti-Korapsen Plen

Sif Seketeri bilong gavman, Sir Manasupe Zurenuoc i toOkaut long dispela wik long wanem samting gavman i wok long mekim long stopim korapsen long kantri. Sir Manasupe i tok save long ol samting gavman i kamapim long Nesanel Anti-Korapsen Plen ov Eksen 2012 – 2015.

Dispela Plen ov Eksen em ol teknikel plen i bihainim Nesanel Anti-Korapsen streteji. Gavman i gat 14 program bilong ol wok namel long 2012 – 2015.

1. Kirapim Nesanel Anti-Korapsen Plen ov Eksen
2. Kirapim Nesanel Anti-Korapsen Seketeriet
3. Kirapim Independen Komisn Egens Korapsen Komisn
4. Kirapim Lo bilong Independen Komisn Egens Komisn
5. Kirapim Opis bilong Spesel Prosekyuta long Korapsen

6. Kirapim Lo bilong Disklosa Proteksen

7. Kirapim Lo bilong Pablik o Opisal Infomesen Ekses

8. Kirapim Korapsen-Risk Menesmen na Mitigesen Fremwok

9. Strongim Lidasip na Kopret Gavanens

10. Senisim Wok bilong Fainensel Disbesmen

11. Givim moa wok long Spesel Investigesen Task Fos

12. Wok bung gut wantaim ol Sivil Sosaiti Grup

13. Strongim ol Odit na Akauntabiliti institusen

14. Strongim Pablik Prokumen Sistem

Sir Manasupe i tok as bilong kamapim ol dispela bikpela wok na ol lo em long rausim pasin bilong korapsen insait long kantri.

Long Februeri 2014, Palamen i bin mekim sampela senis long kamapim Independen Komisn Egens Korapsen (ICAC) we ol memba bilong gavman na oposisen

wantaim i bin sapatim. Dispela i makim namba wan step bilong kirapim PNG ICAC na i soim olsem ol politisen tu i les long korapsen i kamap bikpela moa insait long PNG.

Long Novemba 2015, ol memba i tok orait long Ogenik Lo bilong ICAC long namba wan riding insait long palamen. Dispela ICAC Bil i mas gat tripela riding bipo long en i kamap lo.

Sampela bikpela samting insait long ICAC Lo em ol wok na pawa, apoinmen bilong ol Komisina na ol wokman na wok bilong en wantaim ol arapela anti-korapsen na lo enfosmen ejensi na husat bai skelim wok bilong ol.

ICAC bai wok wantaim ol polis, Pablik Sevis Komisn, Ombudsmen Komisn, Odita Jeneral na opis bilong Pablik Prosekyuta.

Long taim ICAC i statim ol wok bilong en, bai em i lukluk long ol korapsen keis

long gavman na long ol praivet sekta tu. Gavman i bin kisim tingting bilong ol saveman na meri long olgeta hap bilong kantri na ovasis tu, bipo long ol i mekim ol senis long Konstitusen.

Ol tupela bikpela lo em inap long strongim wok bilong ICAC em, Disklosa Proteksen lo o wisel-bloa lo. Narapela lo em long kirapim Pablik Infomesen Ekses lo. Ol wok i kamap yet long dispela tupela lo na long taim ol i kamap lo, bai ol i strongim moa wok bilong ICAC.

Ol dispela lo bai opim rot bilong ripot long korapsen, na long stopim ol arapela pipel i mekim wankain pasin nogut. Dispela lo bai helpim tu ol nius ripota long ripot long ol dispela kain stori na bai opim rot long ol sitisen bilong kantri i kamap na tokaut long ol pasin bilong korapsen.



Published Weekly, Thursday, for Word Publishing Company, Ltd.

P.O. Box 1982, Boroko, NCD
Papua New Guinea

Telephone: (675) 325 2500

Fax: (675) 325 2579

Email: editorial@wantok.com.pg

Websait: www.wantokniuspepa.com

Pe bilong wanpela yia, 52 niuspepa

Ples:

PNG

AUSTRALIA

ASIA PACIFIC na JAPAN

AMERICA na EUROPE

Air:

K220.00

US\$110.00

US\$150.00

US\$210.00

General Manager

Elizabeth Konga

Editor

Veronica Hatutasi

Published at Able Building Complex, Sec 58 Lot 02, Waigani Drive.

Word Publishing Company Limited is owned by the four major churches of Papua New Guinea - Catholic 55%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general term acceptance are available at Word Publishing Company Ltd and are set out full on the display advertising form.

Meri Enga winim TV long nupela Brian Bell stua

Wanpela mama i winim LED TV long Brian Bell Homecentre opening de long Visin Siti long Pot Mosbi.

Brian Bell Homecentre i opim dispela nupela brens long Visin Siti long dispela wik Mande. Namba wan kastoma bilong ol em i wanpela meri Enga, husat i bin kisim Star Vision 32" LED TV.

Dian Ambil, husat i gat 9-pela pikinini, i kisim dispela presen bilong kamap namba wan kastoma bilong Brian Bell Homecentre long Visin Siti.

Stua menesa bilong Brian Bell Homecentre, Helen Sisimutu, i givim dispela presen i go long Dian, husat i bin baim wanpela Air Monster fen.

Dian i tok em i amamas long kamap namba wan kastoma bilong dispela nupela stua.

"Mi wanpela strongpela kastoma bilong Brian Bell bikos mi save baim ol samting long Brian Bell tasol.



Dian Ambil (lephan) i kisim LED TV long Helen Sisimutu (raithan), stua menesa bilong nupela Brian Bell Homecentre long Visin Siti.

Aninit long Enga Searching na Recovering Women Association, mi bin baim ol masin bilong samap na narapela ol samting long Brian

Bell long helpim ol mama long mekim liklik bisnis,"Dian i tok.

Brian Bell Homecentre long Visin Siti i save op long 9 klok mon-

ing na pas long 9 klok nait. Em i wok log salim ol samting long spesel prais.

Dispela stua i op long bikpela ples bilong wokim soping long Visin Siti bihain long ol i mekim Visin Siti i go bikpela.

Dispela nupela soping senta i lukim sampela nupela bisnis haus na kampani i go insait na opim nupela stua pinis.

Jeneral Menesa bilong Visin Siti, Anderson Ting, i tok dispela nupela soping senta i gat 20 spes long larim 20 stua i op.

Brian Bell i kisim wanpela bilong dispela 20 spes. Ol biknem kampani olsem Huawei na Cool Stuff bai opim nupela stua bilong ol

long neks wik Mande.

"Haus kai bilong baim ol kaikai bai gat 7-pela nupela stail kaiba we ol kastoma bai amamas long baim kaikai long laik bilong ol yet,"Mista Ting i tok.

Ol bisnis haus olsem City Clothing, Wantok Clothing, Shoeland, Police Apparel, 2 Fast Motors, Kids Apparel na Ice Cream Parlour bai kisim wan wan nupela stua na ba opim stua bilong ol klostu taim tasol.

Mista Ting i tok Digicel bai kisim wanpela spes na opim nupela stua.

"Dispela i mekim Visin Siti kamap wanpela bisnis senta insait long Pot Mosbi we ol manmeri i ken baim ol samting insait long wanpela ples tasol,"Mista Ting i tok.

Em i tok ol i wok long kirapim planti nupela samting long larim Visin Siti i kamap wanpela stailpela soping na bisnis senta long Pot Mosbi.

Agiru: Hela bai kisim LNG benefit yet

HELA Gavana Anderson Agiru i tok Hela Provins bai stretim tok-tok wantaim Sauten Hailans Provinsal Gavman long brukim long namel ol benefit bilong PNG LNG Projek.

Maski 75 pesen ges bilong PNG LNG Projek i kam long Hides na Angore long Hela, Hela Provinsal gavman i no bin sainim Ambrela Benefit Sering Agrimen (UBSA) long Kokopo long yia 2009 long kirapim dispela ges projek bikos Hela i no bin kamap provins yet long dispela taim.

Tasol Klos 24 bilong UBSA i toktok long larim Hela na Sauten Hailans i brukim dispela ol benefit bilong PNG LNG.

"Yes, Hela i no bin kamap provins yet long yia 2009. Hela i kamap provins long yia 2012. Tasol Klos o Hap 24 bilong UBSA agri-



Pastaim Menesing Dairekta bilong ExxonMobil, Peter Graham, Prais Minista Peter O'Neill na Hela Gavavan Anderson Agiru i katim kek long makim pinis bilong konstraksen pes na komisanim LNG Projek.

men i tok Hela na Sauten Hailans provinsal gavman i mas sainim wanpela agrimen long katim na skelim ol benefit bilong PNG LNG Projek,"Gavana Agiru i tok.

Em i tok em bai bihainim dispela agrimen long katim na skelim gut ol benefit bilong dispela ges projek.

Wanpela bikpela benefit Hela Provinsal Gavman bai kisim em, aninit long dispela 4.27 Kroton Ekwiti, we nau ol papagraun na provinsal gavman bilong ol wan wan projek eria i wok long toktok long baim.

Mista Agiru i tok Hela bai kisim benefit bikos em i save long olgeta samting bilong LNG.

"Mi bin kisim LNG i kam insait long dispela kantri. Sampela man ol save long LNG tasol mi save pas long ol na mi kisim LNG i kam insait long PNG.

"Hela i stap long han bilong mi. Mi bai larim manmeri na provinsal gavman bilong Hela i ksim benefit long dispela ges projek,"Mista Agiru i tok.

CTPA lukluk long gutpela wok yia

KAR bisnis em i bikpela bisnis long olgeta hap bilong wol na PNG tu, tasol i mas gat opis bilong lukautim ol wok long bisnis i ran gut.

Long statim nupela yia 2016, Sentrel Provins Trensport Atoriti (CTPA) i gat nupela plen long mekim dispela yia i wanpela gutpela yia long bungim ol salens na ol wok i ran gut.

Menesa bilong Bisnis Development wantaim CTPA, Jehu Ore i tok olgeta divisen insait long

CTPA i wokim pinis ol plen bilong ol long dispela yia, na ol bai wok wantaim long inapim ol.

Mista Ore i autim dispela tok-tok insait long lotu bung bilong opim nupela wok yia 2016, bihain long tupela wik Krismas na Nu Yia malolo.

Ol woklain i bin amamas na redi tasol long statim wok long nupela yia na karimaut ol wok bilong ol.

CTPA i save wok wantaim

Moto Vikel Insurens Limitet bikos wok bilong ol i klostu wankain, na Mista Ore i tok ol bai skruim dispela wok gen long dispela yia.

Reveren Sabadi bilong Yunaitet Sios husat i bin go pas long lotu bilong opim nupela wok yia bilong CTPA i bin tok CTPA i mekim gutpela wok wantaim komitmen bilong ol woklain, na em i bilip olsem dispela bai wanpela gutpela wok yia long CTPA.

Polye: IPA mas daunim prais

OPOSISEN Lida Don Polye i laikim Invesmen Promosen Atoriti (IPA) long daunim ol prais bilong rejistaim ol nupela kampani na ol arapela sevis IPA i save givim ol pipel.

Mista Polye i tok wok bilong IPA em long promotim ol bisnis na invesmen long kantri na taim ol i paim prais bilong sevis, dispela bai no inap promotim moA bisnis na invesmen long PNG.

Mista Polye i singautim IPA long daunim prais bilong ol sevis na

helpim ol liklik bisnis manmeri long PNG long groim ol liklik bisnis o SME.

"Ol liklik bisnis manmeri i nidim sapot bilong IPA. IPA i mas opim ol nupela bisnis senta long olgeta hap bilong dispela kantri na helpim ol SME long gro na kamap bikpela bisnis long PNG,"Mista Polye i tok.

Em i tok ol liklik bisnis manmeri long PNG i no save long yusim ol kompiuta samting ol onlain sistem bilong IPA.

"Mi singautim IPAlong

daunim ol dispela sevis fi i kam daun. Mekim sampela gutpela samting long helpim ol lokol bisnis manmeri long groim bisnis na kirapim ikonomi bilong PNG,"Mista Polye i tok.

Rejistra bilong ol kampani long IPA, Alex Tongay, i bin givim toksave long niuspepa olsem ol sevis fi bilong IPA bai go antap long nupela yia.

Dispela i lukim sevis fi i go antap na em i no helpim ol liklik manmeri long kirapim nupela bisnis.



SORI LONG PAIA KUKIM HAUS BILONG OL: Tupela marit, Joseph Saa na misis bilong em i lukluk sori long haus bilong ol i bin paia long las wiken, Sarere, long Gerehu. Ol bin stap long dispela haus long 24 krismas. Laki tru na no gat dai o birua i bin kamap, tasol olgeta samting insait long haus i bin paia, olsem stori i stap long pes 3. **Poto : Nicky Bernard**



Ramu NiCo Sefti Odit AS/NZS4801 Kamap Orait

RAMU NiCo Menesmen (MCC) Limited em developa bilong namba wan nikel/kobalt maining Projek long Papua Niugini.

Olsem na olgeta wok maining operesen bilong en i mas bihainim sefti stendet Gavman bilong Papua Niugini i laikim em mas bihainim oltaim. Ramu NiCo i save bihainim maining sefti stendet bilong Australia na New Zealand, em intanesenel stendet we ol wol klas maining projek long Australia na New Zealand i save bihainim.

Dispela Australia/New Zealand Sefti Stendet 4801 odit bilong wan wan yia i mas kamap oltaim insait long operesen kondisen bilong Ramu NiCo. Dispela bai helpim Kampani long wokim kamap gut sefti menesmen bilong en.

Sefti Odit bilong yia 2015 i bin kamap na pinis long Disemba 2, 2015 wantaim gutpela ripot.

Wanpela independen konsalten bilong Australia nem bilong en Easy Risk Solutions Kampani i bin karimaut dispela sefti odit o wok sekim long glasim gut olgeta wok-masin na ol samting bilong Ramu NiCo long KBK Main na Basamuk Rifaineri.

Dispela sefti odit i kisim olsem 9-pela de olgeta..

Sinia Odita, Troy O'Connor, husat i bin karimaut wok long odit i tok amamas long Ramu NiCo long gutpela wok em i wokim long bihainim na stretim ol komplaiens sefti bilong en long ol yia i go pinis.

Mista O'Connor i tokaut tu olsem i gat sampela eria i stap we wok i mas kamap long kamapim gut wok long sait long sefti. Olsem na em i askim Kampani long wok moa long stretim sefti komplaiens bilong en.

Odit bilong dispela yia i stat long KBK Main long Novemba 25. Dispela sefti odit i bin lukluk raun long ol wok eria olsem Pawa Plent, Maining Plent, Washing Plent, Fixed na Mobile Plent na ol arapela wok eria.

Ol proses o rot long karimaut

ol wok sekim o odit em oditai lukluk na wokim ripot, em i askim kwesten long ol wok lain na tu em i askim long wanem ol rot ol wok lain long wan wan dipatmen i bihainim long karimaut wok operesen. Em i bin askim tu ol wok lain sapos ol i save gut i klia long main sefti wok polisi.

Odit o sefti wok sekim i bin kamapim long ol bikpela prosesing plent tasol bikos ol arapela eria i gat ol bikpela masin na bikpela presa na kemikol. Odit long BSK Rifaineri i bin kisim 4-pela de olgeta.

Las miting bihain long Odit i bin kamap long KBK Main long Disemba 2, 2015 we Odita Mista O'Connor i givim sotpela ripot bilong wok em i wokim i go long Kampani. Dispela samari miting em olgeta wok eria bilong Ramu NiCo i bin lukim long video konfrensing.


Presiden bilong Ramu NiCo Menesmen (MCC) Limited, Mista Wang Jicheng i tok amamas long independen odita i karimaut odit.

Wanem ripot dispela independen odita i kamapim em bai givim long PNG Gavman lain olsem Mineral Risoses Atoriti na ol arapela stekholda.

Presiden Wang i wokim strongpela toktok i go long olgeta maining operesen dipatmen long KBK Main na ol Basamuk Rifaineri dipatmen long bihainim stret ol foapela bikpela lo long saitlong sefti na promotim sefti menesmen.

Dispela Australia/New Zealand Sefti Stendet 4801 odit bilong wan wan yia i mas kamap oltaim insait long operesen kondisen bilong Ramu NiCo. Dispela bai helpim Kampani long wokim kamap gut sefti menesmen bilong en.

1. Odit i kamap long Basamuk Rifaineri.
2. Mista O'Connor sekim ol BSK wof gad long askim long sefti.
3. Las odit miting i bin kamap long KBK Main.



MV Pasifik Link Kisim nupela wok long PNG

MV PASIFIK Link, namba wan trening na medikal sip bilong ol YWAM Medikal Sip, i kam bek gen long Papua Niugini long kirapim nupela medikal na trening wok long Madang na em i opim rot bilong bringim sevis long ol nambis ples bilong Madang Provins.

Menesing Dairekta bilong YWAM Medikal Sip, Ken Mulligan, i tok em i amamas tru long nupela wok bilong MV Pasifik Link bilong wanem, em bai hariapim nupela wok bilong YWAM Medikal Sip long wok wantaim planti moa lokal komyuniti long ol nambis ples i stap longwe.

“Visen bilong mipela long wok wantaim ol ki stekholda long PNG em long ranim tripela sip long karamapim olgeta nambis ples na ol alan bilong olgeta rijon long PNG,” Mista Mulligan i tok.

“Dispela em i wanpela bikpela samting i kamap long statim dispela wok.” Em i tok.

TMV Pasifik Link em i bin namba wan sip bilong YWAM Medikal Sip, na em i bin stat wok long Galp na Westen Provins pastaim long ol i pinisim wok bilong em long 2014 na long 2015 nupela sip MV YWMA PNG i kisim ples bilong en long helpim ol pipel long ol-



YWAM Misin Medikal Sip Medikal Sip MV Pacific Link kam bek gen long PNG na statim nupela wok long Madang.

geta hap bilong Sauten Rijon na long Huon Galp long Morobe Provins.

Mista Mulligan i tok olsem MV Pasifik Link i bin stap olsem wanpela gutpela strongpela sip. Wantaim dispela sip YWAM i bin bringim 249,000 helt na trening sevis insait long ol yia 2010 i go long 2014.

MV Pasifik Link i lusim Pot Mosbi long Fraide 8 Januari long moning taim long wokim namba wan ran bilong em i go long Madang Provin, aninit

long lidasip bilong Dairekta bilong noten koslain, Brett Curtis.

Sampela toktok wantaim ol stekholda long PNG i givim tingting long wanem narapela stip moa bai kamap long skruim wok bilong trening na medikal sevis raun long kantri.

Mista Mulligan i tok olsem, MV Pasifik Link i bin kisim singaut bilong Memba bilong Sumkar, Ken Fairweather long go statim wok bilong en long Sumkar Distrik.

“MV Pasifik Link bai wok olsem wanpela pilot sip taim mipela i skruim wok bilong mipela i go moa, na mipela i bilip yet long painim wanpela nupela na moa bikpela sip insait long narapela tripela yia bihain,” Mista Mulligan i tok.

MV Pacific Link i kisim welkam long ol opisal bilong Madang long Mande, pastaim long em bai statim praimerihelt ke wok wantaim dentis na trening wok long ol nambis ples long Sumkar Distrik.

Wasu LLG Stesin kostu bai pas

WASU Lokal Level Gavman (WLLG) long Tewai Siassi distrik, Morobe Provins nau i no stap gut.

Wasu Lokal Level Gavman Presiden Petrus Yasing i bin tok olsem stat long 2013 – 2014 LLGSIP gren K500,000.00, we gavman i bin makim long go long LLG tasol dispela mani i stap yet long distrik treseri akaun na ol i no mekim wok bilong LLG.

“Mani mak olsem K1 milien bilong LLGSIP gren em ol lida bilong LLG i gat strongpela tingting olsem distrik treseri mas yusim pinis long narapela wok.

“Wasu LLG i stap bagarap tru na i no gat wanpela mani long

mekim wok. Mipela laikim wanpela odit tim bilong Nesenel Gavman o Morobe Provinsal Gavman long kam na wokim wanpela gutpela wok painimaut long wok bilong Tewai Siassi Distrik na pasim Sialum opis,” Presiden Yasing i tok.

Em i tokim ol gavman opisa bilong Dipatmen bilong Nesenel Plening na Monitaring, Fainens na Opis bilong Rurel Developmen husat i bin go mekim sampela lukluk raun long las Desemba olsem Wasu LLG i gat planti kleim bilong ol lain i givim wok sevis na i no kisim pei yet. Ol i wok nating. Ol i save tromoi mani bilong ol yet na i save go long Sialum

Distrik opis tasol ol i no gat ol pablik sevan i wok.

“Em i mekim laip i hat tumas long mipela. Olgeta mani bilong mipela i stap long distrik treseri. Taim mipela i go ol i save tok CEO i go long Finschaffen, Distrik Tresera i go long Lae na mipela i paul olgeta,” Yasing i tok.

Wasu LLG Menesa, Engam tu i wanbel wantaim toktok bilong Presien Yasing. Em i tok ol kesual woka bilong LLG Semba i no bin kisim pei inap long tupela yia nau. Ol i bin kisim las pei bilong ol long Mas 2015.

LLG Presiden na LLG Menesa i tok ol i bin rait i go long Morobe Provinsal edministresen long dispela samting tasol no

gat man i harim krai bilong ol. Distrik i no wok na em i givim hevi long ol pipel bilong mipela.

Yasing i tok Wasu LLG i wet nating. Nau ol i laikim olgeta fainensel pawa long i go daun long, Kabwum na ol i ken wok long Kabwum distrik hetkwata na i no long Sialum bikos i no gat ol pablik sevan long hap. Ol i tok memba bilong ol, husat i minista bilong Fiseris Mao Zeming tu i no save sindaun long holim ol DDA miting long distrik.

President Yasing i laikim Wasu mas bruk lusim Tewai Siassi distrik na go bung wantaim Kabwum distrik olsem wanpela LLG bilong ol.



Wasu LLG Maket stap nating wantaim bun bilong haus i sanap das karamapim.



Wasu LLG Presiden Petrus Yasing i toktok long wanem as na LLG bilong em i stap bagarap.

Save bai sevim laip

Namba wan kolum bilong helt nius long ol gutpela toksave bilong lukautim yu yet long laip. Yumi stat wantaim toksave i kam long Pot Mosbi Jeneral Haus sik kolum bilong wik.

Ol hevi bilong dring bia tumas – namba wan hap

POT Mosbi Jeneral Haus sik i toktok long ol hevi i save kamap long dring bia na ol strongpela dring na wanem samting bai kamap long bodi na long save moa long gutpela wei bilong dring alcohol.

Bia na ol strongpela dring i save bagarapim laip bilong ol pipel long planti kain we. Sampela lain i save dring gut wantaim gutpela tingting tasol ol tui nap long painim birua o ol tu inap kamapim birua na hevi long ol narapela. Long PMGH mipela save lukim ol hevi bilong dring bia olgeta dei. Planti bilong ol dispela hevi em i no mas kamap tasol ol i save kamap.

Helt na sefti bilong yu em i namba wan samting we yu mas tingim taim tingting bilong yu i kirap long kisim bia o strongpela dring. Husat man o meri i save dring tumas olgeta taim em i gat bia o strongpela dring em i stap long mak bilong kamapim birua long em yet na long narapela lain tu.

Strongpela dring o planti bia tumas bai inap long mekim man o meri kamap olsem longlong o tingting i paul. em i ken mekim man o meri i airaun, na bodi bai slek, em i ken traun na inap kamap hap dai tu.

Em i ken giamanim tingting bilong man o meri nae m bai mekim rong disisen we bai inap long kamapim birua long ol narapela lain olsem brukim lo long kamapim pait, stil, kamapim ka eksiden long draiv na kamapim dai tu. Sapos yu pilim olsem yu no inap long dring gut bia na strongpela dring, em i gutpela long yu mas lukim wanepela dokta bilong yu long pasin bilong dring bia i save kamapim wanem kain hevi.

Em inap long kaikai olgeta mani bilong yu na bai yu no gat mani bikos yu bai laik long baim bia olgeta taim.

Moa long neks wik.



Gavman mas sapotim olgeta spot... i no ragbi tasol

LIDA bilong Oposisen, Don Pomb Polye i tok Praim Minista Peter O'Neill na Minista bilong Spot na Nesenel Ivent, Justin Tkatchenko i mas kamapim spot olsem wanpela rot bilong mekim mani long kantri.

Polye i bekim toktok bilong gavman na tok em i mas lukluk gut long ol toktok we em i bin mekim.

"Minista bilong yumi i no kisim toktok bilong mi gut.

"Long dispela toktok, mi bin tok long tupela samting. Em edministresen na menesmen bilong ragbi, na kirapim ol narapela spot long kantri," Polye i tok.

Em i tok i gat nid i stap long fandim ol narapela spot long kamapim ol nupela gutpela



Oposisen lida, Don Polye

pilaia.

"Taim mipela i stap long gavman, mipela bai givim wankain mani long kamapim ol narapela spot olsem resing kar, haiking, boksen,

soka, swimming, etletiks, sut-ing, kriket, basketbal, beis bal, ragbi yunien na sampela moa.

"Mipela bai putim ol dispela spot i go insait long edukesen silabas bilong ol pikinini bilong yumi i ken stat long lainim ol dispela samting long elementri inap long ol hai skul," Polye i tok.

Em i tok moa olsem gavman i no ken pasim ai bilong em na go het long sapotim ragbi lig wantaim ol hevi i stap yet long independens taim inap nau.

"PNG Kumuls i no moa go long wanpela gutpela resis na mipela bai no inap go het long putim mani long ragbi lig taim ol dispela hevi i stap yet," Polye i tok.

Bikpela yia bilong kik boksen long PNG

Philemon Tame i raitim

OL kik boksa insait long kantri i gat bikpela yia i stap long pait long intenesenel resis na 4-pela resis insait long kantri wantaim Papua Niugini Gems.

Ol bai stat long dispela yia long Kik Boksen Peter O'Neill Kap we ol i makim long pilai long Me 6 inap 8 long Pangia Distrik long Sauten Hailans Provins.

Kik boksen klap long Niugini Ailan Rijon bai mekim wok redi tu wantaim ol paita bilong rijonal kik boksen sempionsip bai kamap long Kokopo, Is Nu Briten long 24 Jun inap 26.

Ol kik boksa long Hailans

na Momase bai i gat sans tu long soim talen long 2016 Kik Boksen Hailans na Momase bai kamap long Lae, Morobe Provins long Ogas 26 inap 28.

Ol bai lukluk ol dispela tonamen na makim fainal skwat long makim PNG long pait long Wol Yunifai Sempionsip bai kamap long Itali, Rom long Oktoba 25 inap 30.

Dispela yia bilong pait bai pinis wantaim PNG Gems bai kamap long Novemba 16 inap 30 long Kimbe, Wes Nu Briten Provins.

Presiden bilong PNG Kik Boksen Federesen, Stanley Nandex i tok, "Ol i lukluk long ol dispela resis bai

kamap long kantri na ol bai makim wanpela tim long Wol Sempionsip."

Federesen i lukluk olsem namba bilong tim bai kamap long mak bilong mani we ol seholda, gavman na ol kampani bai helpim.

Dispela sempionsip pilai bai kisim lukluk bilong kantri mak long 105 na moa wantaim 12 masol arts na kik boksen bodi long resis long dispela tonamen.

Nandex i tok, "Olgeta provins bai kamap ol wan wan liklik resis bilong ol yet olsem makim maus long developim spot na talen insait long kantri."

PNGRFL Development Tim bai go long Hailans

PAPUA Niugini Ragbi Futbal Lig (PNGRFL) Development Tim bai karimaut nupela skil trening bilong kosa na referi i go long olgeta Lig i bin afiliet wantaim Hailans Konfederesen stat long tumora (Fraide), Januəri 15, na ol bai pinis long Ramu na Lae.

I gat agriment i stap bihain long Australian Ragbi Lig i bin tok orait long PNGRFL long kamapim PNG Kosing Akreditesen Setifiket, na dispela bai givim gutpela sans long ol lain husat bai stap insait long dispela setifiket trening long go het na kisim moa skul long kisim Level 1 wantaim 3-pela setifiket.

Dispela setifiket i gat moa pawa we ol i ken kamap kosa o referi long intenesenel level.

Guma Opi bai lukautim Referi apdet na em bai

toktok long, ol referi i ken toktok long rot we ol pilaia i mas wanbel na rispektim referi na gem long taim bilong pilai.

Nesenel Developmen Menesa bilong PNGRFL, Toksy Nema, kamap supavaisa bilong ol kos updet bai stat long Wabag, Enga long Januəri 16, na go olsem long Banj, Jiwaka long Januəri 20, Goroka long Januəri 22, Ramu long Januəri 25 na Lae long Januəri 27.

Ol kosa na referi bilong ol afiliet lig husat i tingting long stap long dispela kos na ol i no toksave long ol wan wan Rijonal Development Opisa i ken toksave long ol nau.

Olgeta Rijonal Development Opisa bai bung long NSTI long Goroka long yia konfrens long Januəri 23 na 24.

Bikpela tenkyu i go long NRL long kisim spesol gest, NRL Development Opisa, Brian Rowe, husat bai wok wantaim Rijonal Development Opisa bilong mipela long konfrens. Ol bai mekim PNGRFL Development Tim i kamap nupela long PNG Entri Level Akreditesen bilong ol kos i ken go long olgeta afiliet Lig long dispela sisen i kam.

PNGRFL i tok tenkyu tu long ol gutpela sponsa patna bilong mipela olsem NGCB, PNG LNG, Air Niugini, na Boroko Motors long ol i go het na sapotim Tim Kumul program we pastaim i no bin stap olsem.



PM BAI OPIM: Nupela ragbi stedium long Pot Mosbi(bipo PRL) bai op long namba tu wik bilong Mun Februeri long dispela yia, 2016. Dispela toktok i kam long Minista bilong Sports na Tourism Justin Tkatchenko taim em bung wantaim ol nius manmeri long Tunde long nupela Ragbi Stedium. Em tok Praim Minista Peter O'Neil bai opim. Long poto CEO bilong PNG Sports Foundation Peter Tsiamalili junia, Sports na Trourism Minista Justin Tkatchenko, FIFA U20 Womens World Cup CEO Seamus Martens na Tourism Promotion Authority eksekutiv opisa David Vincent. Poto Nicky Bernard.

Moa weitlifting resis long dispela yia

I kam long bek pes...

Em i tok moa olsem, "Lukluk bilong mipela i stap long Senia Tim long kisim tupela pilai we wanpela man na wanpela meri aninit long mak we Tim i bin putim long makim kantri na pilai long Rio Olimpik Gems."

Sir John i tok moa olsem Junia na Yut Tim bai pilai sapos ol i gat inap mani. "Tasol, mipela i win long 2015 Pasifik Gems resis i kamap aninit long Developmen Program bilong mipela na Osenia

Sempionsip em i namba wan resis long salim ol Junia na Yut tu," Sir John i tok.

Coffa i tok, "I no gat wanpela PNG i kwalifai aninit long strong bilong ol yet, nogat."

"Nau mi gat strongpela tingting olsem Morea Baru, bai mekim gut bipo long Osenia Sempionsip na Rio Olimpik Gems bai kamap," Coffa i tok.

"Dispela i moa klia bikos Baru i bin winim wanpela gol medal long 62 kg divisen long 2015 Pasifik

Gems we em i bin hapim 121 kg.

Moa long 24 kantri bai resis long Osenia Sempionsip long kwalifai long pilai long Rio Olimpik Gems.

PNG i rausim bit long hostim 2016 Komonwel Weitlifting Sempionsip bihain long Malaysia i go insait long bit, na PNG bai no inap long kamapim 2016 Komonwel Weitlifting Sempionsip.

"Mipela i rausim bit bikos mipela i save olsem Malaysia em i namel hap bilong kamapim Komonwel

Weitlifting Sempionsip na gavman bilong ol i save mekim bikpela sapot long Turis Indastri," Sir John i tok.

Tim PNG bai go resis long Rio Olimpik Gems, tasol ol bai no inap long pilai long olgeta resis olsem ol i resis long 2015 Pasifik Gems.

Tim PNG i no makim ol pilaia bilong fainal tim yet. Lista bilong spot na ol ivent we Tim PNG bai pilai long Rio Olimpik Gems em ol bai tokaut long taim ol i redi.



KISIM MALOLO: Bal boi bilong NSL kisim liklik malolo long hap taim bilong NSL pilai long Bisini.



KAM KISIM MI: Midfilda bilong Rapatona i autim bal taim straika bilong Erema i kam klostu. Rapatona i win 3-1

STAP LONG WEI: Beks bilong Hekari(No2) i pasim straika bilong Gigira long kisim bal long NSL pilai bilong long Sande. Hekari i win 4-2.



BAI REDI NAU: Minista bilong Spot na Turis i tokaut long ol nius manmeri olsem Ragbi stedium bai redi long pinis bilong Febuari.



SANAP NAU: Ol wok man bilong nupela ragbi stedium i rdi long go sanapim gol pos bilong ragbi. OL POTO Nicky Bernard.

FINA i bung wantaim USADA na USA Swimming

LONG promotim spot na lukautim rait bilong ol etlit, FINA i bin bung asde (Trinde) long Lausanne wantaim CEO bilong US Anti-Doping Ejensi (USADA), Travis T. Tygart, na Dairekta bilong Sains, Dokta Mathew Fedoruk, na mausman bilong Swiming long USA, Jim Wood long toktok long dispela topik.

Ol het tok olsem WADA na FINA rul long anti-doping program, Komunikesen wantaim Nesenel Federesen na Etlit, ol streteji long Etlit Baiolojikel Paspot, na mekim plen long ol bai mekim tes long ol pilaia husat bai pilai long Rio Olimpik Gems long 2016.

Wantaim ol narapela wankain

bung wantaim Nesenel Anti-Doping Ogenaisesen na FINA Nesenel Federesen em mausman bilong FINA i redim ol samting i bin kamap pastaim long kamapim FINA Anti-Doping rul, we WADA i toktok planti long en.

Bung em i wanpela sans taim tu long toktok long USADA i mekim ol wok gut bilong bihain

taim long pait egensim doping long ol hap bilong pilai.

Long dispela Olimpik Gems bai kamap, ol namba wan swima long olgeta swiming kantri bai go insait long bikpela tes wanpela mun pas long gem bai stat long Rio Olimpik.

FINA i lukim olsem planti yia i go inap nau, olgeta disisen bilong

FINA em ol i tokaut long FINA websait.

"Mipela i amamas long bung wantaim ol memba bilong Federesen na ol Nesenel Anti-Doping Ogenaisesen long toktok long ol bikpela asua i bin kamap insait long Federesen na stopim ol dispela samting long i no ken kamap moa," Travis T. Tygart i tok.



IMPROVED TASTE! Niupela teist wantaim planti mit na oil. Teistim na bai yu laikim moa yet.

DIANA Tuna



Emi tuna bilong PNG

PROUDLY PNG MADE

Manufactured by



RD Tuna Canners Ltd

Moa mit na oil insait



TUNA IN OIL

Moa weiltlifting resis long dispela yia



Piksa i soim Senia Weiltlifia bilong PNG, Steven Kari, i bin apim bikpela weit long taim bilong 2015 Pasifik Gems. Nau, dua i op long ol Senia Weiltlifia olsem Kari na ol narapela moa i ken go resis long Osenia Sempionsip, tasol ol i mas kamap long mak bilong Minimam Kwalifikesen Standet we Osenia Weiltlifting Federesen i putim bilong ol long kwalifai. *Piksa: Wantok fail*

Philemon Tame i raitim

DISPELA yia, 2016, i gat moa resis bai kamap insait long Pasifik rijn na bikpela weiltlifting resis bai kamap long rijn em Rio 2016 Olimpik Gems long mun Ogas.

Long mun Mas inap Jun, 4-pela bikpela resis bai kamap em Australian Open Intenesenel, Osenia Sempionsip, Komonwel Sempionsip, Olimpik Gems, na i gat wanpela bikpela trening kem bai kamap tu.

Jenerel Seketeri na Rijonal kosa bilong Osenia Weiltlifting Federesen, Paul Coffa, i tok ol i mekim wok redi long olgeta resis bai kamap long dispela yia.

Trening hap bilong ol weiltlifia long Osenia

Weiltlifting Institut i mekim wok redi long ol wan wan resis long makim ol wan wan kantri bilong ol.

Namba wan weiltlifia bilong PNG, Steven Kari, i bin lusim PNG Weiltlifting Federesen bihain long liklik toktok i kamap namel long Kari na Presiden bilong PNG Weiltlifting Federesen, Sir John Dawanincura.

Tasol, Sir John i tok klia olsem em i bin bung wantaim Coffa long Gol Kos, Australia long Tunde moning na Coffa tok orait long olgeta etletiks i stap long gutpela mak bilong pilai long Osenia Sempionsip sapos ol i bungim PNGWF Minimam Kwalifikesen Standet.

Ol eksekativ bilong PNGWF i toktok long las mun olsem dua i op long Steven Kari, Guba

Hale na Sandra Ako wantaim ol narapela senia etlit tu.

Sir John i tok, "Olgeta weiltlifia wantaim Steven Kari i mas kamap long mak bilong Minimam Kwalifikesen Standet we Konsalting Osenia Weiltlifting Federesen i bin putim long en long mipela i ken makim ol.

"Frank Robby na ol lain bilong mekim seleksen bai rivi o lukluk gen long stail bilong pilai bilong ol pilaia na ol bai makim ol aninit long rivi ol bai mekim.

"Dispela bai kamap olsem bikos, Osenia Sempionsip bai kamap long Fiji em i hap bilong seleksen we husat pilaia i daunim ol narapela bai kwalifai long pilai long Rio Olimpik Gems," Sir John i tok.

I go moa long pes 26...

● Lukim spots poto - pes 27 ● Gavman mas sapatim olgeta spot..ino ragbi tasol - P26

Mitsubishi FUSO Rosa Bus



Apgrad ensin 130Hp 4 silinda disel



Ikamap Wantaim 26 na 30 Sit



Hariap nau na go long Boroko Motors dila bilong yu



Port Moresby ph: 325 5255 | Lae ph: 472 1144 | Mt Hagen ph: 542 1933 | Tabubil PH: 649 9048
Kimbe PH: 983 5035 | Madang PH: 422 2659 | Kokopo PH: 982 8193 | Goroka PH: 532 3552

Email: info@borokomotors.com.pg
Website: www.borokomotors.com.pg

